

Ufficio Stampa della Provincia autonoma di Trento

Piazza Dante 15, 38122 Trento

Tel. 0461 494614 - Fax 0461 494615

uff.stampa@provincia.tn.it

COMUNICATO n. 1932 del 28/06/2023

Traduzione in ladino

“Trentino no filter - la cultura per te”: nef contest per joegn

“Trentino no filter - la cultura per te”, n nef concors con pes per joegn creatives, l é stat portà dant en jebia ai 22 de jugn aló da la Sala Belli de la Provinzia autonoma de Trent. L contest l é stat pissà per valorisèr la richeza e la desvalivanza de la perferida culturèla trentina tras l lengaz che i joegn cognosc miec: chel di social media. Tousc e toutes dai 18 ai 24 egn enciasé te la Tèlia pel tor pèrt col manèr ite n contegnù per TikTok, Instagram o YouTube bon de raprejentèr da sie pont de veduda la cultura tel Trentin. L contegnù pel tor ite fotos, video, carosie o stories dintornvia l patrimonie culturèl del post te duta sia esprescions: dai lesc d'èrt al bal, da la storia ai evenç, dal teater ai personajes. L material cogn vegnir manà ite dant dai 25 de aost del 2023. La scomenzadiva la é stata metuda a jir dal assessor a l'istruzion, università e cultura, Mirko Bisesti, che te la conferenza stampa l à manà n video de salut, da la Repartizion istruzion e cultura, dal Servije attività e produzion culturèla de la Provinzia autonoma de Trent. La scomenzadiva vegn coordenèda da Trentino Film Commission, sezion de Trentino Sviluppo che se cruzia del ciamp audiovisif, co la colaborazion de Trentino Marketing. A la leta sie pes encin a 2.500 euro per chi che rua ti prumes pos de la classifica. Regolament e formulèr de encinuazion i é a la leta sul sit trentinofilmcommission.it.

L contest “Trentino no filter - la cultura per te” se ouc ai joegn che vel jir ite tel cher de la perferida culturèla trentina e la raprejentèr con contegnui social fora de anter e enteressanc.

“Chest concors – l à dit l assessor provinzièl a l'istruzion, università e cultura, Mirko Bisesti – l é na ocasion per la generazions joenes de durèr sia creatività tras post, stories o video reel per contèr a na vida particolèra la cultura tel Trentin. Dantdaldut l é n invit a descorir la perferida culturèla, dapodò na domana de condivijion acioche ence chi che no la cognosc delvers posse aprijièr sia formes de esprescion”. “Trentino no filter defat – l à dit amò Bisesti – vel valorisèr la cultura da anchecondì col engaissèr belimpont i joegn a esser curiousc, a enrescir e a zelebrèr a na vida publica dut chel che tel Trentin a sie veder pel esser considrà cultura”.

La vides per tor pèrt é states portèdes dant tel detai da **Alessandra Schiavuzzi**, sorastanta del Servije attività e produzion culturèla de la Provinzia, e da **Luca Ferrario**, diretor de Trentino Film Commission. “Con chest bando – l'à despiegà Schiavuzzi – se vel fèr vegnir fora l pont de veduda di tousc desche consumadores ma ence creatorès e promotores de cultura tras operes con cheles che i contará i apuntamenc culturèi e la scomenzadives de chest istà”. “Sarà enteressant – l à sotrisssà enveze Ferrario - veder coche i tousc durarà lengac che i cognosc delvers per contèr sia idea de cultura”.

No l é limitazions en cont di strumenc da durèr per la creazion di contegnui digitèi, ma chisc i cogn respetèr ghenao la opzioni stabelides tel Regolament, desche “Feed Post de Instagram con n carosel de amancol 3 fotos olache cogn esser la geolocalisazion e i tag di sogec prinzipièi touc ite” o ence“video TikTok

inspirational (max 20 sec tel format 9:16) con musega trending de la piataforma e tag di sogec principèi touc ite tel video”.

Vigni contegnù creà cognarà aer enjontà n test per na publicazion ideèla e na curta descrizion de la rejon per chela che l é stat pissà.

Chi che tol pèrt vegnarà spartii te doi categories: 18-20 egn e 21-24 egn. Per vigniuna de chesta categories la Comision dezidará i venjidores. I prumes te la classifica de la doi categories venjarà 2.500 euro per om, chi che rua secondi i ciaparà 1.500 euro e tinultima chi che rua terc 500 euro. Vegnarà fat a saer i inomes di venjidores e vegnarà fat la premiazion ai 14 de setember del 2023.

La domanes per tor pèrt cogn vegnir manèdes ite dant da les 5 domesdì de en vender ai 25 de aost del 2023, demò col scriver ite 1 formulèr online aldò publicà sul sit de Trentino Film Commission
www.trentinofilmcommission.it.

Retrac e intervistes a cura del Ofize stampa

De autra informazions su: www.trentinofilmcommission.it

L assessor Mirko Bisesti

<https://www.youtube.com/watch?v=CEMPzjFv800&t=7s>

La sorastanta Alessandra Schiavuzzi

https://www.youtube.com/watch?v=mV_kmJOFoK4&t=2s

La prejentazion

<https://www.youtube.com/watch?v=4i3DJ8LWWrs&t=3s>

Link per desiarièr

<https://wetransfer.com/downloads/09016bddbc238541d522488a126ce5020230622131635/ab8949f349d0b10>

Traduzion di Servijes Linguistics e Culturèi del Comun General de Fascia

(cdt)